

Dua nelayan Malaysia yang ditahan pihak berkuasa Indonesia selamat pulang
Astro Awani
Jun 16, 2016

SEKINCHAN: Dua nelayan di Sekinchan yang ditahan pihak berkuasa Indonesia kerana dipercayai menceroboh perairan negara itu, akhirnya kembali ke pangkuan keluarga masing-masing.

Nelayan berkenaan, Chua Lee Teck dan Heng Chee Yong tiba di Jeti Pantai Redang sekitar jam 5.30 petang ini.

Walaupun keletihan, kedua-dua mereka menzahirkan kegembiraan sebaik sahaja ternampak kelibat ahli keluarga masing-masing.

"Tiada perkataan dapat menggambarkan perasaan saya ketika ini.

"Kami pun baru sahaja mengetahui tentang pembebasan kami semalam," kata Chee Yong.

Lee Teck pula melahirkan perasaan yang sama seperti rakannya.

Ketika ditanya keadaan ketika dalam tahanan, kedua-duanya menggelengkan-gelengkan kepala sebelum Lee Teck menyatakan bahawa ianya amat sukar.

"Kami menderita," jawabnya ringkas.

Sebelum ini, Timbalan Perdana Menteri Datuk Seri Dr Ahmad Zahid Hamidi dilaporkan berkata, pembebasan mereka diluluskan berikutan Presiden Indonesia, Joko Widodo telah menandatangani surat pengampunan terhadap nelayan berkenaan.

"Oleh kerana mahkamah Indonesia telah menjatuhkan hukuman dan tempoh rayuan telah tamat, usaha telah dilakukan oleh Perdana Menteri Datuk Seri Najib Tun Razak dengan menghubungi Presiden Jokowi," kata Zahid.

Kementerian Luar sebelum ini, mengesahkan tiga bot nelayan Malaysia iaitu SLFA 4625, PKFB 1512 dan KHF 1917, ditahan pihak berkuasa Indonesia.

Berdasarkan maklumat pihak berkuasa Malaysia dan Persatuan Kebajikan Nelayan dan Peniaga-Peniaga Ikan Sekinchan, tangkapan itu dilakukan di perairan Malaysia serta

tidak konsisten dengan persefahaman sedia ada antara kedua-dua negara berhubung isu berkaitan perikanan.

Tag: [Nelayan Sekinchan](#), [nelayan bebas](#), [pihak berkuasa Indonesia](#), [Najib Razak](#), [Joko Widodo](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/dua-nelayan-malaysia-yang-ditahan-pihak-berkuasa-indonesia-selamat-pulang-108357>